

Avat Pieder de Putnengia (1402-1438)

da pader Iso Müller

translatau da sur Balzer Pelican

La tgina dalla famiglia ministeriala de Putnengia, oriunda da Mustér, fuva il casti da Putnengia en Tujetsch, baghegius entuorn igl onn 1200. Sias melancolicas ruinas regordan aunc oz da pompa stulida e gloria passada. Duront "il temps da sgarschur" senza imperatur, ei la muntada dils nobels u cavaliers carschida. Per part eran ei temi castellans da rapina. El decuors dil 13/14avel tschentaner han ei era acquistau influenza predominanta enta Tujetsch ed ell'entira Cadi. Grazia a lur situaziun e sedia feudala fuvan ils nobels de Putnengia ils fatgs mediaturis denter Ursera e la Cadi, denter il Rein e la Reuss. Sil pli tard dapi il 14avel tschentaner havevan ei possessiuns ad Ursera sezza. Igl onn 1363 fuva schizun Duri de Putnengia mistral d'Ursera. Alla fin dil 14avel tschentaner ha denton la veglia splendur dalla famiglia entschiet a sblihir. Clau, il bab digl avat Pieder, ha vendiu 1377 ils beins da Schlans; Cilia, la sora digl avat, ha alienau ils 23 da schaner 1402 il bein de Ragisch (Wurtzenstein) sper Mumpé-Medel. En quella burgameina compara Pieder per l'emprema ga sco ugau da sia sora Cilia e sco avat da Mustér. Gia 1398 havein nus entupau el alla cumpra dalla vischnaunca da Tenna, sco Custos dalla claustra e representant digl avat Gion, dil qual el fuva il maun dretg. Sco indigen ha el scochemai continuau la politica concilionta ed indulgenta da siu grond predecessur avat Gion de Glion (1367-1401). Perquei ha el 1404 vendiu l'alp Pazzola als vischins da Medel per in tscheins annual da 4 "schillings" caschiel sil di da s.Martin. Sch'il tscheins vegn buca pagaus, ha igl avat il dretg da pretender il dubel dil tscheins annual. Da pesar il caschiel ha il salter da Medel.

Dil tutfatg niev ed agen ei la politica amicabile d'avat Pieder de Putnengia cun la Confederaziun. En quei risguard ha el completau excellentamein la politica retica da siu predecessur. Al sistem d'allianza d'anno 1395 a Glion, ha el aschunschiu il sistem d'assicuranza, sch'ins astga duvra in expressiun da Bismark. Igl ei ver ch'igl avat ei alla entschatta vegnius suspectaus per adversari dalla Confederaziun. Anno 1403 han numnadamein ils da Sviz fatg in patg culs Appenzelles per proteger quels encunter ils Songaglies ed Austriacs. Quei mument enquera Habsburg da crear in'allianza encunter Sviz e da gudignar per sesez igl uestg da Cuera ed igl avat da Mustér. Enderschend ils da Sviz quell'as tentativas, fan ei en ina brev grevas reproschas agl avat Pieder. La risposta da quel exista aunc. Ella ei datada dils 5 da mars 1403, pia per circa dus meins avon la victoria dils Appenzelles a Vögelinsegg. En tun ualti recent declara igl avat, ch'el seigi bein vegnius dumandaus dals ambassadurs austriacs, mo che ni el ni il Cumin dalla Cadi hagian serrau ina ligia cull'Austria e vegnien era mai a serrar ina tala. Els veglien s'alliar cun negin sil mund, deno culs da Sviz. Il patratg final dalla risposta ei sco in sarament che maunca buca da grondezia historica: "Nus lein haver sin tiara negin auter signur che Niessegner!" Quella risposta secatta aunc oz egl archiv federal a Sviz, vengonza da vegnir conservada denter las veglias burgameinas dalla Confederaziun. Avat Pieder sez haveva cussegliu als da Sviz da tener ella per impegn.

Murend 1403 Galeazzo Visconti a Milaun, era il ducadi da Milaun per ir en farcaglia. Ils signurs da Sax-Mesau han occupau Blinzuna e Blenio, ils Uranes la Leventina. Aschia ei la via dil Munt Avellin (s.Gotthard) vegnida pli e pli en dominonza dils Confederai. Perquei ei avat Pieder seschus en pli intimas e stretgas relaziuns cun quels. Anno 1407 cumpra el ad Altdorf ina casa ed ina cuort per 330 glivras uranesas. Probablamein per completar quella staziun uranesa, ei fors'aunc d'avat Pieder de Putnengia sez la schinumada "Casa de Mustér" a Lucerna vegnida erigida. Aunc il medem onn 1407 ha igl avat obtenui dals Uranes il dretg da vischinadi. Quei ei bein buca daventau ton per beinvuglientscha sco culla finamira da metter tiarms alla carschenta pussonza abbaziala egl Uri. Han ei gie stabilii en la burgameina da vischinadi ch'igl avat astgi buca posseder sin intschess uranes beins per pli che la valeta da 500 glivras. Medemamein han ei spladiu ad el tutta art e part dallas alps uranesas. Quei era mo l'entschatta d'aunc pli grondas strinschidas. Suenter l'occupaziun dalla Leventina (1403) fuva la via dil Munt Avellin naven da Fliela tochen Lodrino en mauns uranes. Ei muncava sulettamein il tschancunet: Ursera. Encugnada encunter miezdi e mesanotg quasi denter pella e pisun, haveva Ursera buc autras letgas che da sealliar 1410 cun Uri entras in contract da vischinadi, denton sco member adual e buca subordinau. Aschia ei la val d'Ursera s'allontanada aunc pli lunsch dall'abbazia da Mustér, suenter che gia l'immigraziun dils Vallesans ad Ursera egl 11/12avel tschentaner haveva giu tratg ina lingua da separaziun sil Cuolm d'Ursera e suenter ch'ils d'Ursera fuvan

politicamein i tut atgnas vias dapi il 13avel tschentaner. (1283 haveva Habsburg obteniu l'ugadia d'Ursera, 1317 fuva in Uranes subugau, 1382 survegn Ursera dal retg Wenzel la brev da libertad.) La guardia dil Gottard steva buca pli ell'enzenna dalla Crusch da Mustér, mobein el segn dil bov dad Uri. El patg da vischinadi da 1410 ha Ursera bein resalvau ils dretgs dall'abbazia. Mo facticamein dava ei tonaton bia vischins d'Ursera che cartevan ch'ils dretgs dalla claustra seigien ussa liquidai. Igl avat ha giu da far da conventscher quels d'Andermatt da ses dretgs. Per 1425 ein las duas partidas puspei vegnidas perina. Ils d'Ursera savevan puspei eleger sezs lur mistral, mo quel stueva mintgamai serender a Mustér per obtener dagl avat "uffeci e dicasteri". Persuenter surdava il mistral agl avat in per vons alvs. Sin s. Martin stuevan ils subdits pagar il tscheins da lur beins. Per incassar quel tarmetteva la claustra in agen official ad Ursera, al qual il mistral haveva dad esser gideivels, secapescha encunter commensurada bonificaziun. Sch'in pagava buc il tscheins enteifer treis dis suenter la vegnida digl official, haveva el da star neu per donn e cuost da quel. Nunallegaus ella brev da 1425 era il dretg dalla claustra da presentar il plevon d' Andermatt. Mo quei usit ei mal vegnius contestaus da quels d'Ursera. Denton ei la connexiun ecclesiastica denter Ursera e Mustér buca stada uerta da strenscher e rinforzar ils ligioms politics e territorials. Cul patg da vischinadi da 1410 sevolva la daditg tudestgada Val d'Ursera cullas undas dalla Reuss encunter Altdorf, la retoromontscha Val Tujetsch cullas undas dil Rein enviars Mustér. Il stat dil Lucmagn perda sia anteriura provinzia e confinescha alla greppa dil Six Madun. Mo la regurdientscha dils de Putnengia svanescha mai ord la historia d'Ursera. Schegie ch'il discuors romontsch digl avat el senn da Caspar Muoth en siu "Cumin d'Ursera" ha mai giu liug ad Ursera, essend la vallada gia daditg tudestga, ei igl avat da Tujetsch tonaton sefatgs fetg meriteivels per las relaziuns cun Mustér ed ha spindrau ad Ursera quei che fuva aunc da spindrar. La finfinala eran las raschuns geograficas ed economicas pli fermas che las ecclesiasticas e politics. Dapi ch'il pass dil Gottard ei vegnius en flur, era ei mo ina damonda dil temps, che la Val d'Ursera sefetschi independenta e sesparti dal stat claustral da Mustér.

In grond meret d'avat Putnengia ei l'amplificaziun e renovaziun dalla Ligia da Glion da 1395. Eifer la venerabla miraglia digl emprem marcau sper il Rein ein 1395 s'alliai igl avat da Mustér, il barun da Razen ed il cont da Sax-Mesauc cullas vischnaucas (cumins = Hochgerichte, valladas) da Mustér, (pia dalla Cadi) e dalla Lumnezia. Exactamein sco la Confederaziun svizra ei 1291 naschida allas rivas dil Lag dils quater Cantuns, aschia ha era la confederaziun grischuna priu origin allas frestgas rivas dil giuven Rein. Cheu sco leu ina ligia cuzzonta, illimitada, perpetna. La vart tipica dalla Ligia da Glion fuva l'alleanza denter signurs e pievel, da sum e dem, semegliantamein sco la Confederaziun dils 8 loghens denter ils marcaus e las tiaras. La nova ligia da Glion ha spert conquistau contrada per contrada: 1395 s'alliescha la Foppa, ton sco ella apparteneva als conts da Werdenberg-Sargans, 1399 il segneradi da Trin, che apparteneva als conts da Werdenberg-Heiligenberg, 1400 Valrein, 1406 ei era Schons s'alliaus transitoriamein. Mo 1412-1419 ein ils caposignurs dalla Ligia vegni in davos l'auter. Igl avat da Mustér, che fuva antiaustriacs, ei vegnius en scarpanza cul barun da Razen, che teneva cull'Austria. Ils baruns da Razen sescagnavan medemamein culs conts da Sax-Mesauc pervia da beins ella Foppa, che omisdus pretendevan. Ton che la Ligia da Glion era per ir en scalgias. Igl ei il grond meret dil Tuatschin da haver spindrau la Ligia e renovau ed extendiu quella ils 16 da mars 1424 a Trun. Quei ei daventau sil plaz ordinari da dertgira sper la via imperiala, damaneivel digl ual spimont da Ferrera en in englar, l'enzenna caratteristica dil qual era in terment ischi. In mument veramein commemorativ eis ei stau, cura ch'ils representants da tontas dinastias e vischnaucas reticas han alzau il maun encunter tschiel clamond per perdetga "Diu ed ils sogns" da vuler renovar la Ligia per adina. Per redember meglier a futuras dispetas ei la gia existenta dertgira dalla Ligia vegnida cumpletada e remediada. Buca mo ils caus principals astgavan eleger in derschader, era Valrein pudeva eleger dus ed ils Libers da Lags in. Sche quels 6 derschaders vegnevan buca perina, savevan ei trer tier aunc 1-3 auters. Tgi che sesuttametteva buc alla sentenza maioralda da quels 9 derschaders stueva vegnir turzegiaus da tuts confederai. Il diember dils derschaders ei cuninaga carschius considerablamein. Gia 1438 ein 15 derschaders documentai. Alla testa da quels stava il cau-ligia. Ei fuva ina parallela cun Uri. Leu ein 15 derschaders documentai gia 1406. Aschia ha facticamein la Ligia Grisca survegniu nova veta e vigur. Cun raschun ha perquei era Trun e buca mo Glion la honur dad esser liug da fundaziun dalla Ligia Grisca. Aunc daplì! Anno 1395 han ins expressivamein concludiu da seradunar mintga 5 onns a Trun per renovar la ligia. Pia Trun e buca Glion fuva il vuliu e desiderau simbol dalla Ligia Grisca. Ins vuleva tener las radunonzas sin tiara sontga dalla claustra da Mustér e buca sin territori dallas dinastias secularas. La renovaziun ed amplificaziun dalla Ligia da 1424, sut il

maiestus ischi da Trun, han per tut avegnir predestinau quel sco simbol dalla Ligia. Igl ei e resta ver: "A Trun sut igl ischi nos babs ein serimnai ... " Trun resta il sanctuari dalla libertad sursilvana. Mo per quei astga il meret d'avat Gion da Glion (1371-1402) buca vegnir sminuius. Glion e Trun ein las tginas dalla Ligia. Avat Gion ed avat Pieder ein omisdus babs dalla Ligia Grischa. Buca mo in ni tschel, mobein ton in sco l'auter!

La solemna renovaziun dalla Ligia da 1424 muntava per il Tuatschin la cruna da siu operar. Suenter quei eveniment era sia autoritad tala, ch'igl ei stau per lu pusseivel ad el da sviluppar energeticamein sia acziun politica sper las rivass dil Rein anteriur. Sut sia bitgetta ein per gronda part las difficultads denter ils commembers dalla Ligia vegnidass lugadas. Entrass sia mediaziun ein aunc 1425 ils deivets dils baruns da Razen alla Ligia Grischa vegni liquidai.

Il medem onn ha avat Pieder reconciliau ils baruns da Razen ed ils conts da Sax-Mesauc. Quei onn ha el era - sco gia allegau - stipulau ils duers dils d'Ursera enviass Mustér. Suenter haver giu pacificau lass rivass dil Rein, ha el era saviu empruar da reconquistar lass rivass dalla Reuss.

Denton haveva igl uerbel Tuatschin buca emblidau sia politica amicabla culla Confederaziun. Da miez october 1425 han 500 da Sviz fatg ina invasiun en la Val d'Eschen conquistond Domo d'Ossola, mo ein vegni tschinclai d'ina armada milanessa. Sco da far da cuorer han ils auters Confederai festginau da purtar agid als da Sviz. Ils 10 da november han ils dad Uri, Sviz e Lucerna conquistau il marcau liberond ils tschinclai. Ils 12 da november arrivass ils Turitges, ils 13 da november 700 guerriers da Pieder de Putnengia e dalla Ligia Grischa, ils 14 finalmein era ils Bernes e Soloturnes. Ils 16 da november ein tuts returnai a casa sur ils pass en nevada. Separticipond da quella expediziun guerrilla en Val d'Eschen a pro da Sviz, ha avat Pieder mussau als da Sviz, che havevan 1403, cun caschun dall'uiara appenzellessa, dubitau da sia fideivladad, che sia empermischun dada da lezzass urass, seigi buca stada mo ina frasa. El contract da pasch dils 4 cantuns cun Milaun d'anno 1425, ei perquei era igl avat vegnius cumpegliass e consideraus quasi sco confederau affiliau dalla Svizra centrala. Cheutras haveva Pieder art e part dalla libertad da dazi, stipulada per 10 onns, sill'entira via dil Gottard entochen lass portas da Milaun, per ir e returnar, per export ed import. A Biasca sbuccava gie la via dil Lucmagn en quella dil Gottard, aschia che la libertad da dazi muntava in considerabel success per Mustér. Dil reminent ha Pieder tuttavia buca negligiu il Lucmagn. 1406 ha el gie renovau in contract commercial cun Blenio. Plinavon ha el 1413 e 1431 hospitaus imperatur Sigmund, vegnius sur il Lucmagn, sco pelegrin en claustra. Per ventira ei il cumadeivel regent buca sefermaus ditg a Mustér; pertgei el garegiava splendidas perdanonzas, sco la cassa episcopala da Cuera ha malamein stuiu experimentar. Ei para denton ch'igl imperatur seigi vegnius hospitaus pulit a Mustér, silmeins anno 1431. Puplau ha el mo da buca haver survegniu in letg sco sauda a Blenio. Ad avat Pieder caztgava ei buca fetg da dedicar siu temps ad aults honors. El leva survir al pievel. Anno 1427 fa el il mediatuor denter quels da Schons ed ils conts da Werdenberg-Sargans. Ils da Schons han contonschiu lur independenza, mo stuevan pagar vinavon ils tscheins e lass dieschmas. Era ils da Lags fuvan vegni en scarpanza cun lur signurs, ils conts da Werdenberg-Sargans. Principalmein entrass intermediaziun d'avat Pieder han els 1428 pudiu secumprar liber dal domini dils Werdenberges per la summa da 300 renssch dad aur. Per far ton meglier la segira, han 1434 ils da Lags fatg prender si els dagl uestg da Cuera sco commembers dalla Casa da Diu. Persuentar han ei regalau agl uestg il laghet sur il vitg, cun resalva ch'avat Pieder astgi pescar en quei lag, abundonts da peschs, cura ch'el vegli e schi ditg sco ei plaigi. Quei privilegi valeva denton mo per igl avat persunalmein. Ses successurs pudevan guder quella favur mo cun expressiva lubientscha digl uestg sez. Quella pintga circumstanzia muossa co ils merets digl avat vegnevan prezias e renconuschi. Che Pieder de Putnengia fuvu atgnamein il menader dalla Ligia Grischa documentessha la cunvegnientscha fatga 1427 entrass sia mediaziun denter ils baruns da Razen ed ils paders da Faveras, che secattinavan pervia da beins e tscheins a Domat. Anno 1438 ha igl avat puspei presidiau ina dertgira che haveva da metter perina il cavalier Albrecht Tumb culs baruns da Razen, che fuvan els deivets tochen culiez.

Ei ei a vista da tontas mediaziuns stravagau da numnar avat Pieder de Putnengia il retg nunencorunau e dalla Surselva, naven da Rueras entochen Razen? Sias pacificaziuns fan endamen igl operar pacifcont da siu grond predecessur avat Thüring d'Attinghausen-Schweinsberg (1327-53), che ha reussiu da lugar la dispeta da 200 onns denter Sviz e Nossadunnaun pervia dalla March. El ei veramein quel che ha eliminau ils scarpetschs e consolidau la Ligia Grischa. Avat Pieder ha aunc giu il confiart da ver 1436 a fundond la Ligia dallas 10 dertgiras. Sch'el ei era buca staus persunalmein igl autur da quella, ei ella tuttina stada l'encoronaziun dil moviment communal, ch'el ha adina promoviu el senn da siu grond predecessur. Mo quei che Pieder de Putnengia proseguava senza calar, la uniun

cun la Confederaziun, ei serealisau per 1497, cura che la Ligia Grischa ei sco emprema dallas ligias reticas s'affiliada alla Confederaziun entras in patg perpeten. Senza avat Pieder fuss quei impurtont pass sil pli pauc s' entardaus per ditg e liung.

Ins s'imagina ordinaramein Pieder de Putnengia sco venerabel avat cun termenta barba e crusch tarlischonta. Muoth conta: "Agl avat la crusch tarlischa, sut la lada barba grischa" Mo historiografs ed archeologs dian a nus che las barbas fuvien da gliez temps ina raritad. Era arisguard siu num existan divergenzas. Ellas burgameinas originalas da 1419 e 1438 senumna el "Peter von Pultningen". Mo tgei emporta ei la finala ch'el hagi giu barba ni buc, ch'el seigi staus de Putnengia ni Pultnengia? Sia statura historica resta pressapauc quei ch'ella fuva: Pieder ei staus in grond avat. Nus havein forse repartiu ses merets empauet autruisa, accentuau sia politica onz federala che retica; mo cheutras attribuin nus gie ad el aunc pli vast horizont ed aunc pli fin senn politic.

Forsa ein ils duns economics d'avat Pieder aunc strusch vegni apprezzai sufficientamein. Ils Tuatschins ein glieud spargnusa. Avat Pieder fuva dalla medema era: in bien administratur e bab da casa. La curia papala ha incumbensau el 1404 da proteger dus cruschai da Zug encunter repressaris e 1405 in Turitges encunter l'usura da gediun. Da l'autra vart ha el 1417 renviu la damonda d'in collectader d'in papa cassaus dal concil da Constanza, che vuleva adispet far pagar suenter il tscheins che la claustra da Mustér fussi stada culponta a Roma sco claustra da patronat papal. - Dil concil da Constanza ei avat Pieder buca separticipaus ufficialmein, schegie ch'el po esser staus presents inaga ni l'autra. Il spargnus Tuatschin ei mintga cass senuspius dallas spesas unidas cun ina presentanza prenciabbaziala a Constanza. Il cuntrari ha igl uestg da Cuera, Hartmann da Werdenberg, fatg, che ei cumparius leu ufficialmein. Significativ eis ei, ch'igl avat da Mustér ha saviu empristar daners agl uestg da Cuera, ch'ei vegni turnai per suenter la mort da quel. Igl uestg apparteneva aunc alla generaziun postfeudala dalla Cuort burgognesa, ferton ch'igl avat haveva gia il spert mercantil dils marcaus talians dalla renaissance.

Pieder de Putnengia haveva tutta raschun dad esser spargnus, demai che la claustra piteva aunc fetg dil barschament da 1387. Mo per caussas pias haveva el tonaton cor e maun aviert. Probablamein ha el aunc restaurau in ton dalla baselgia da s.Maria e s.Pieder, ch'el ha fatg consecrar solemnamein dagl uestg da Sion Guglielm da Raron. Per esser preservaus da novs incendis entras urbida da s.Gada, ha el engrondu totalmein siu sanctuari ch'existeva gia dapi igl 11avel tschentaner sper il stradun dil Lucmagn. Alla cantunada nordorientala ha el erigiu in bi clutger da stil roman. Plinavon ha el fatg alzar il curmal dalla baselgia, proveder quella cun in plantschiu da lenn ed in zenn gotic. In talentus pictur dalla Germania meridionala ha ornau il mir settentrional dil sanctuari cun ina colorusa retscha da stupents maletgs gotics ord la veta dalla gloriosa martra siciliana. Avat Pieder ha era fatg tagliar orda lenn ina biala statua dalla sontga cun vestgiu sularau, che ei aunc oz postada sigl altar lateral da vart seniastra. El ha medemamein fatg sculpar ina Madonna gotica cun cruna e scepter per la caplutta da Nossadunna sil Lucmagn. Cun tut esser spargnus semussava il Tuatschin adina generus per igl ornament dallas casas da Diu.

Cun quet giustificau san Tujetsch e la Cadi, la claustra e la Ligia Grischa era dacheudenvi pronunziar il num digl avat Pieder de Putnengia. El mereta dad esser e restar il simbol dalla libertad. Quei che renda el il pli simpatic a nus ei forse siu patertgar svizzer ed antiaustriac. Ei para sco sch'el less aunc adina clamar a memoria sia parola: "Nus lein esser subdits a negin sin tiara, auter che a Diu."

Fontaunas: Documentaziuns el concept pli extendiu „Die Entstehung des Grauen Bundes 1367-1424". Zeitschrift für Schweiz. Geschichte 1941 (Lehmann & Co. Zürich). Plinavon la survista el „Bündner Monatsblatt" 1941-1942. Concernent s.Gada, mira Zeitschrift für Schweiz. Archeologie und Kunstgeschichte 1941.